

Na osnovu člana 28. do 30. Zakona o mjerama za unapređenje stočarstva („Službene novine F BiH“ broj 23/98), Zakona o veterinarstvu („Službene novine F BiH“ broj 46/00) i člana 23. Statuta općine Ključ („Službeni glasnik općine Ključ“, broj: 3/10 i 3/11), Općinsko vijeće općine Ključ na svojoj VII redovnoj sjednici, održanoj dana 30.09.2017. godine u Ključu, utvrdilo je

N A C R T O D L U K E

O USLOVIMA DRŽANJA I GAJENJA PČELA NA PODRUČJU OPĆINE KLJUČ

I - OPĆE ODREDBE

Član 1.

Ovom odlukom propisuju se uslovi za smještaj pčelinjaka, način preseljenja pčela, uslovi držanja i iskorištavanja pčela, odnosi koji proizilaze iz oprašivanja bilja pomoću pčela, zaštita pčela i pčelinjaka, te sprečavanje širenja zaraznih bolesti pčela.

Član 2.

U odluci su upotrebljeni izrazi sa sljedećim značenjima:

1. **pčelinje društvo (zajednica)** je skupina pčela (matica, radilice i trutovi) nastanjene na saću u košnici:

2. **pčelinjak** je skupina košnica sa pčelama, koje su smještene na slobodnom prostoru, u posebnoj stabilnoj ili montažnoj kućici ili ugrađene na vozilo:

3. **pčelar** je fizičko ili pravno lice koje se bavi držanjem i uzgojem pčela:

4. **pčelinja paša** je bilje u razdoblju cvjetanja kada ga posjećuju pčele zbog sakupljanja sirovina (nektar, medna rosa, polen i propolis):

5. **pčelinji proizvodi** su; med, vosak, polen, matična mliječ, propolis, pčelinji otrov, matice i rojevi pčela.

II - SMJEŠTAJ PČELINJAKA

Član 3.

Pčelar je dužan brinuti se za pčelinje društvo i pčelinjak.

Član 4.

Pčelar je dužan postaviti pčelinjak tako da pčele pri izlijetanju ne smetaju susjedima, prolaznicima, stoci i javnom saobraćaju.

Pčelinjak do 10 (deset) društava, čija su leta okrenuta javnom putu, mora biti udaljen od javnog puta najmanje 10 (deset) metara, pčelinjak sa 11-20 društava najmanje 15 metara, a preko 20 društava najmanje 20 (dvadeset) metara. Pčelinjak, čija su leta okrenuta prema tuđem posjedu, mora biti udaljen od međe 10 metara, bez obzira na broj košnica, odnosno, ako je vlasnik susjedne parcele saglasan, udaljenost može biti i manja.

Ako je iz bilo kojih razloga propisana udaljenost manja, pčelinjak se mora zaštititi ogradom (gusta plastična mreža za sjenu ili najlon mreža, gusta živica) više od 2 metra i dužinom pčelinjaka za 2-5 metara na obje strane, udaljene od košnica najviše do 10 metara.

Član 5.

Pčelinjak nije dozvoljeno smještati u blizini fabrike za proizvodnju šećera, sokova, prerade voća, bolnica, škola, obdaništa i trgova.

Proizvodni pogoni iz prethodnog stava su dužni onečišćenu ambalažu i proizvode, koji su u stanju štetnom po zdravlje pčela (vrenje i sl.) držati u zatvorenim prostorima ili ih na drugi način učiniti nedostupnim za pčele.

III - SELENJE PČELA

Član 6.

Pčele se mogu seliti na pašu samo iz područja i samo u područje bez zaraznih pčelinjih bolesti.

Prilikom selenja pčela moraju se ispoštovati sve mjere za sprečavanje širenja zaraznih bolesti pčela i spriječiti nanošenje bilo kakve štete pčelinjacima koji se već nalaze na terenu na koji se vrši doseljavanje pčela.

Član 7.

Za smještaj pčelinjaka na tuđem zemljištu potrebna je saglasnost vlasnika odnosno korisnika zemljišta.

Član 8.

Za doseljavanje pčelinjaka sa drugih općina potrebna je saglasnost izdata Službe za razvoj, privredu i zajedničke poslove općine Ključ..

Pri podnošenju zahtjeva za saglasnost za doseljavanje pčela sa drugih općina potrebno je priložiti:

1. Potvrdu o broju košnica izdatu od nadležne službe ili udruženja pčelara općine iz koje se doseljava pčelinjak;
2. Izjavu o namjeravanom vremenu doseljenja i dužini boravka boravka ;
3. Prijedlog lokacije za smještaj pčelinjaka (izvod iz posjedovnog lista, skica parcele) i pisana saglasnost vlasnika ili korisnika zemljišta;
4. Uvjerenje izdato od nadležnog kantonalnog veterinarskog organa da na području sa kojeg se doseljavaju pčele nije registrovana američka trulež (kuga) pčelinjeg legla.
5. Uvjerenje o zdravstvenom stanju pčela u pčelinjaku;
6. Mišljenje Udruženja pčelara „Pčela - Ključ“ za smještaj pčelinjaka.

Služba za razvoj, privredu i zajedničke poslove općine Ključ ne može dati saglasnost ukoliko nisu kumulativno ispunjeni uslovi iz stava 2. ovog člana.

Član 9.

Upravni odbor Udruženja pčelara „Pčela-Ključ“ će izdati saglasnost za smještaj pčelinjaka vodeći računa o broju pčelinjih društava na određenoj lokaciji, stanju pčelinje paše, zaštiti od prenošenja bolesti i sl.

Najmanja dozvoljena udaljenost doseljenog od postojećeg pčelinjaka nemože biti manja od 300 metara, u vrijeme medobranja.

Navedena udaljenost može biti i manja, od propisane, ukoliko se s tim saglasi pčelar-vlasnik postojećeg pčelinjaka

Član 10.

Odredbe člana 8. stav 1. i 2. i člana 9. ove Odluke odnose se na pčelinjake koji se doseljavaju, novoformirane pčelinjake i na proširivanje postojećih pčelinjaka

Član 11.

Vlasnik pčelinjaka, koji je doseljen suprotno odredbama ove Odluke, obavezan je ukloniti isti u roku od 3 (tri) dana. Ukoliko se pčelinjak ne ukloni u predviđenom roku, pčelinjak će biti prinudno uklonjen, a troškove uklanjanja snosi pčelar-vlasnik pčelinjaka.

Član 12.

Na pčelinjaku, koji je doseljen, na vidljivom mjestu mora biti istaknuta ploča sa podacima o broju pčelinjih društava, imenu i prezimenu vlasnika, adresa i broj telefona

IV - PRIJEVOZ PČELA

Član 13.

Pčelinja društva je dozvoljeno prevoziti svim prevoznim sredstvima koja osiguravaju zatvaranje tako da pčele ne mogu izlijetati niti se košnice mogu same otvoriti.

Izuzetno kod noćnog selenja, gdje leta košnica mogu biti otvorena.

Član 14.

Pčelinja društva koja se sele na ispašu moraju imati pratioca.

Paketni rojevi i matice u kavezima ne trebaju imati pratioca.

V - USLOVI DRŽANJA I ISKORIŠTAVANJA PČELA

Član 15.

Pčelari mogu pomoću pčela organizovano oprašivati biljne kulture uz dogovorene uslove sa vlasnicima plantaža.

Član 16.

Vlasnik ili korisnik zemljišta treba omogućiti pčelaru praćenje i hvatanje odbjeglog roja, ako se pri tome pričini šteta, pčelar je dužan istu nadoknaditi vlasniku, odnosno korisniku zemljišta.

Ako odbjegli roj ne bude skinut u roku od 24 sata, smatra se da vlasnik roja nije poznat.

Član 17.

Svaki pčelar je dužan obezbjediti stalni veterinarski nadzor na svom pčelinjaku.

VI - ZAŠTITA PČELA

Član 18.

Svaki pčelar je u cilju suzbijanja zaraznih bolesti dužan odmah prijaviti Udruženju pčelara i nadležnoj veterinarskoj organizaciji ili inspekciji nadležnoj za oblast veterinarstva svaku sumnju na američku trulež (kugu) pčelinjeg legla.

Nadležni organi i Udruženja pčelara će poduzeti dalje potrebne mjere u pogledu ispitivanja uzoraka, rješavanju problema, u skladu sa zakonom.

Član 19.

Vlasnik ili korisnik zemljišta koji upotrebljava sredstva za zaštitu bilja, koja su štetna za zdravlje pčela, kao i pravne osobe koje provode dezinsekciju, obavezni su o tome obavjestiti pčelare i Udruženje pčelara. Obavještavanje pčelara se obavlja putem sredstava javnog informisanja, a Udruženja pčelara pismenim putem najmanje 48 sati prije tretiranja, navodeći vrstu bilja, područje i površinu, vrstu sredstava i vrijeme tretiranja. U slučaju odgađanja tretiranja, organizator je dužan na isti način obavjestiti pčelare i Udruženja.

Fizičko lice koje vrši tretiranje na manjim površinama dužno je neposrednim kontaktom o tome obavjestiti pčelare u krugu 3 km, od mjesta tretiranja. Tretiranje hemijskim sredstvima vršiti isključivo u večernjim satima.

Član 20.

Pčelar je dužan ukloniti sve uzroke koji bi mogli izazvati grabež na svom pčelinjaku, radi zaštite svog i susjednih pčelinjaka.

Član 21.

Na pčelinjacima koji su postavljeni prema odredbama ove Odluke, zabranjen je pristup neovlaštenim osobama, uznemiravanje pčela, otvaranje košnica i nanošenje bilo kakve štete na pčelinjaku.

VII - KAZNE NE ODREDBE

Član 22.

Novčanom kaznom od 100 KM, kazniće se;

- pčelar koji postavi pčelinjak suprotno odredbama člana 4. i člana 5.
- pčelar koji vrši prevoz pčela suprotno odredbama člana 13. i člana 14.
- pčelar koji odbije nadoknaditi štetu prema članu 16.
- pčelar koji ne spriječi grabež prema članu 20.

Član 23.

Novčanom kaznom u iznosu od 200,00 do 500,00 KM kazniće se:

- pravno lice koje ne postupi po odredbama člana 5. stav 2.
- pčelar koji ne postupi po odredbama člana 11.
- pčelar koji ne obezbijedi veterinarski nadzor po članu 17.
- pčelar koji ne prijavi sumnju na bolest po članu 18.
- fizičko lice koje izvrši tretiranje suprotno odredbi člana 19.
- fizičko lice koje postupi suprotno odredbama člana 21.

Član 24.

Novčanom kaznom u iznosu od 1.000,00 do 3.000,00 KM kazniće se:

- pčelar koji vrši selenje pčela suprotno odredbama člana 6. i člana 8.
- Udruženje pčelara koje izda saglasnost suprotno odredbama člana 9.
- pravno i fizičko lice koje vrši tretiranje hemijskim sredstvima suprotno odredbi člana 19.
- za iste prekršaje kazniće se i odgovorno lice u pravnom licu novčanom kaznom u iznosu od 200,00 do 500,00 KM.

Pravno i fizičko lice je dužno nadoknaditi štetu pčelaru.

VIII - ZAVRŠNE ODREDBE

Član 25.

Obzirom da ne postoji zakonska regulativa iz oblasti pčelarstva na nivou F BiH i USK, Općinsko vijeće općine Ključ će izvršiti usaglašavanje ove Odluke u roku od 180 dana po donošenju propisa iz ove oblasti.

Član 26.

Općinska Služba za razvoj, privredu i zajedničke poslove općine Ključ će u saradnji sa Udruženjem pčelara „Pčela-Ključ“ izvršiti popis postojećih pčelinjaka u roku od 30 dana od dana stupanja na snagu ove Odluke.

Član 27.

Nadležnost za provođenje ove Odluke imaju: Udruženje pčelara „Pčela-Ključ“, Služba za razvoj, privredu i zajedničke poslove općine Ključ, Kantonalna veterinarska inspekcija i Komunalno-vodni inspektor općine Ključ.

Član 28.

Ova odluka stupa na snagu osmog dana od objavljivanja u „Službenom glasniku općine Ključ“.

Broj: 05-02-_____/17

Datum, _____2017. godine

PREDSJEDAVAJUĆI

OPĆINSKOG VIJEĆA

Adem Crnalić, ekonomist

O B R A Z L O Ž E N J E

I - P R A V N I O S N O V

Zakonom o mjerama za unapređenje stočarstva („Službene novine FBiH“, broj:23/98) čl. 28.-30.utvrđena je nadležnost kantonalnog organa nadležnog za stočarstvo da može donijeti odluku o uslovima držanja i gajenja pčela i o proizvodnji meda i drugih pčelinjih proizvoda.

Pored toga, članom 12., odnosno 21. Zakona o lokalnoj samoupravi USK („Službeni glasnik USK“, broj: 8/11) propisane su nadležnosti jedinice lokalne samouprave, odnosno općinskog vijeća, dok su iste nadležnosti propisane i članom 23. Statuta općine Ključ - Prečišćeni tekst („Službeni glasnik općine Ključ“, broj: 3/10 i 3/11).

Prema tome, pravni osnov je sadržan u citiranim zakonskim, odnosno podzakonskim odredbama, pa u tom smislu, ne postoje pravne smetnje za donošenje ove Odluke.

II - R A Z L O Z I Z A D O N O Š E N J E

Obzirom da ne postoji zakonska regulativa iz oblasti pčelarstva na nivou F BiH i USK, Općinsko vijeće općine Ključ će izvršiti usaglašavanje ove Odluke u roku od 180 dana po donošenju propisa iz ove oblasti.

Ključ, august 2017. godine

O B R A Đ I V A Č I:

- Udruženje pčelara“PČELA-KLJUČ“
- VD SEKRETAR OPĆINSKOG VIJEĆA
OPĆINE KLJUČ

Hamdija Dučanović, dipl. pravnik

P R E D L A G A Č:

Općinski načelnik

Nedžad Zukanović, prof.